

## BASERRIRA IZULPENA

Udaberriko goiza zan,  
Maite-musu gartsuz  
euzkiak ernai zun lurra,  
lorak nun-nai piztuz,  
Txoriak kabi egiten  
alkar urrumatuz,  
zilipurdika belartzan  
umek beiak zaituz.

Bizitza-sua piztu zan  
nere aragian,  
egarri il-eziña sortu  
biotz-muiñ-erdian,  
dei eztitsu bat entzun nun,  
ixil, belarrian,  
ta utzirik baserri zarra,  
sar nintzan errian.

Jo nun bizitza-itzasoan,  
ametsez josia...  
Bañan, iñun etzait ase  
biotz-egarria.  
Nun-nai aurrean euki det  
izar bat argia,  
laga nun baserriaren  
oroipen bizia.

Jaiki ta noan... Laister det  
begien aurrean...  
Ara antxe... Baso-alboan,  
muño-bizkarrean...  
Zuri-zuria, patxaran  
belartza-gañean,  
zabal-zabal ataria,  
elizan antzean.

Agur, ene sor-lekua,  
euskal-lur donea,  
nere aurtzaroko kutxa  
oroi-gaiz betea,  
nere aitonen aitonen  
illobi maitea,  
nere odol-iturburu  
kutsurik gabea...

Nere eusko-odolaren deiak  
entzunda, ba-nator  
maitasun-kabi bero bat  
ezarrizera or,  
nere besoaz eustera  
orma oiei gogor,  
gaurtik il-arte izatera  
baserritar jator.

Bai, gaurtik zuretzat nere  
besoen indarra,  
nere buruko ametsak,  
biotzeko garra,  
begietako malkoak,  
ezpañ-irriparra...  
Gaurtik zure bizitza da,  
nere nai bakarra.

Su aundi bat piztu nai det  
sukalde otzean,  
aingerutxoak ezarri  
seaska-utsunean,  
mentu sendoak txertatu  
sagasti zarrean,  
zorion-euzkia sortu  
baserri illunean.

Aitonen oroi-gai kutxa  
nai det aberastu,  
aien izerdi zintzoa  
nereakin nastu,  
aien ta nere bizitza  
maite-katez batu,  
baserri zarrean kabi  
berria eratu.

Poztu, baserri, gaur-arte  
maite-kabi utsa...!  
Poztu, gaurtik bukatu da  
zure alarguntza...!  
Poztu, ene gurasoak...!  
Begira onuntza...!  
Jainkoak entzun du zuen  
eskari-otoitza.

